

Padu del Caribe tabata un persona polyfacetico cu a hiba un bida exitoso



ORANJESTAD (AAN): Riba Diahuebs 28 di November 2019, e tristo noticia a drenta cu Padu del Caribe a fayece den su soño.

Hopi hende na Aruba conoce Juan Chabaya Lampe como "Padu del Caribe", y nan sa cu e ta un pianista y un cantante. Pero hopi no sa cu Padu tin hopi otro cualidadnan cu lo bo keda sorprendi di dje.

Padu a nace riba un Dialuna, 26 di April 1920. Ora cu el a fayece Diahuebs, e tin 99 aña di edad.

Manera ta conoci, originalmente ta Padu Lampe y Rufo Wever a compone e prome version di nos himno, y cu pa algun decada a keda asina. Despues a pidi Lio Booi pa pone un couplet acerca y esey ta e version cu a keda oficialisa y nos conoce te awe.

Tur e nombenan aki, incluyendo Bernardina Growell, ta personanenan cu semper lo keda den curazon di Arubianonan, pasobra nan a haci y laga un impacto atras den cultura di e isla.

Na aña 2010 ora el a cumpli 90 aña di edad, a lanta un asina yama "Organizacion Padu Lampe" pa festeha su cumpleaños. E organizacion ey tabata bao liderado di Stanley



Arendy y David Cybul, y a conta tambe cu Omaira Britten como miembro. Na 2010 nan a organiza un fiesta riba caya pa festeha e fecha natal di Padu del Caribe.

Tur aña despues di esey, nan a sigui organiza sea un brunch of un comento pa festeha e aña di Padu.

LOKE BO NO SA DI PADU:

Padu ta un persona polyfacetico y ademá di a compone mas cu 500 cancion, el a pinta mas cu 300 pintura.

Aki por mira un di su pinturanan traha na 1936, y e ta pone su firma abao: "JC Lampe".

Ademá ta necesario pa menciona, cu Padu del Caribe a publica 3 buki. Fuera di esey, no tin hopi hende cu sa cu Padu ta un hypnotista Certificá. Na 1966 (como 53 aña pasa) Padu a ricibi su certificado di "Certified Hypno-Technician" di "Association to Advance Ethical Hyp-

nosis" na New Jersey na Merca.

Pesey mes, ora bo bishita e cas di Padu del Caribe den Julianastraat na Playa, bo ta mira su murayanan colga cu monton di certificado; poesia, reconocimento, pintura, y potretnan di dje hunto cu masha hopi personahe famoso, y cada uno na forma silencioso ta relata e storia impresionante di Padu su trayectoria di exito den bida.

Un di e bukinan di Padu yama "Harmoniology" (un



terminologia cu Padu mes a crea pa identifica harmonia interno.) Figura bo, cu ya caba na 1975, prome cu "The Secret" a sali, nos propio Padu del Caribe ya a skirbi ariba "The Law of Cause and Effect." Den e buki aki Padu ta describi loke e ta considera di ta un exito den bida.

E buki aki ta un descripcion fabuloso di "exitu", y Padu ta papia asina cla di dje. Y Padu a bida e exito asina perfecto. Esey nifica cu un persona su pensamentonan mester ta semper positivo y constructivo.

Padu a indica den su buki: "The rule is to keep the mind always filled with pleasant, constructive, wholesome thoughts."

Den e mesun buki Harmoniology e ta splica cu nos enemigo mas grandi ta pa pensa ariba cosnan negativo y destructivo y cu nos tin cu pensa bon ariba kico

nos ta pensa. Nos tin cu evita pensamentonan negativo y destructivo manera miedo, envidia, odio, rencor y rabia. Pa nos por ta exitoso nos tin cu enfoca nos pensamentonan ariba cosnan positivo: perdona, salud, paz, harmonia, felicidad y particularmente amor.

Exito den bida ta hopi facil pa midi. E no ta placa, e no ta fama, e no ta liderato ni nada otro. Exito ta harmonia den nos pensamentonan. Ser exitoso ta nada mas cu por controla bo pensamiento y enfoca pa e gran mayoria di bo tempo bo pensa ariba cosnan creativo, positivo y constructivo.

Padu tabata e chempel bibo di esaki.

Na famianan di Padu, DIARIO ta manda su mas sincero palabranan di pesame. Y cu Dios, tuma Padu den su Reino pa e keda feliz pa bida eterno.

